



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tir\_yimym

yt tir yimym

TAPAK 8

Rathindra Bose West Bengal assembly speaker kumogo

Everton nungi kum 17 asayaba sülen Coleman asaya nungi anentsü



VOL. XXIII ISSUE NO. 212 (ADOK 212) DIMAPUR KÜPTOKNÜ (SATURDAY) MONUPII (MAY) 16, 2026 ₹ 5.00

## Petrol & diesel litre nung Rs 3 atur

**New Delhi, May 15, 2026 (Agencies):** India nung sorkar meyong totzü company temi May 15, 2026 nü petrol aser diesel litre shia nung Rs 3 atuba osang metetdaksüogo.

Küm pezü shi totzü jenjang nung mekongshii aruba sülen sorkar meyong totzü company temi global crude oil jenjang tasakba akümba ajanga jenjang tuogo.

Tanü jenjang atuba sülen Delhi nung petrol litre ka nung Rs 97.77 aser diesel litre nung Rs 90.67 kumogo.

Prime Minister Narendra Modi-i sensotem dang totzü apayua amshitsü mepishiba metetdaksüba sülen anogo ishika lir totzü jenjang reprangshir asütsü.

Taruba anogotem petrol aser diesel jenjangtem tasakba akümtsü kechiyong crude oil tebilemtsü ya West Asia tensa den sendaktepa lir ta ta mongintemi ashir.

"Totzü jenjang atutsüba ya kanga tongtipang. Asangsang nung oil supply kanga tasakba

kumogo aser kechi tia ajurutsü'ar memetet lir" ta Foundation for Economic Development nung Founder-Director Rahul Ahluwalia-i ashi.

Tanü totzü jenjang atuba ajanga aika nung kongshitsü aser taruba anogotem chiyongtsü jenjang, transport taa, online deliveries aser kibong nung itashi sen endokba teimba akümtsü ta economists-i ashir.

Congress aser tanga Opposition party temi petrol aser diesel jenjang atuba atema Modi'er sorkar aitsür aser külen consumers-i kechisarena ajak nung jenjang atuba atema shisabuluba lemsatepogo.

Kechiba elections agiba sülen ang petrol aser diesel jenjang atur ta Opposition-i Centre dang asüngdangogo.

State pezü aser aser Union Territory nung Assembly elections agiba sülen totzü jenjang atur aser iba ya elections sülen PM Modi'er tashiyim agi sen meshiba tenzükba lir ta Opposition-i aitsür.

## NFHRCC-i May 19 nü senden ayonger

**Dimapur, May 15, 2026 (TYO):** Nagaland Foothills Road Co-ordination Committee (NFHRCC)-i May 19, 2026 nü Nagaland tongti Tribal HOHOS 15 den senden ka amentsü metetdaksüogo.

Sendenji anepdang 11:00 ako nung NFHRCC Base Office Kher Mahal, Dimapur nung amentsü.

May 9, 2026 nü NFHRCC-i Dimapur nung amenoka aliba kin hohotem aser Core Committee züngsemtem den senden amendang lemtetba ama iba senden amentsü jazüker aser Hotel Saramati, Dimapur nung

April 14, 2026 nü bangzüng renemba ama lir, anungji nisung ajaki iba senden nung adentsü mepishir ta Media Cell, NFHRCC-i sangdong ka nung metetdaksüogo.

NFHRCC-isa NPWD(R&B) dang MoRTH nungi Mega Project angutsü ataba mapang 2nd Phase Work agütsütsü nenshiogo.

Iba asoshi 2024 nung administrative approval nguogo anungji tekaratiba nung timi open Tender process tenzüksüla ta NFHRCC-isa department dang nenshia metetdaksüogo.

## Nagaland nung SIR Phase-III agitsü

**Dimapur, May 15, 2026 (TYO):** Election Commission of India (ECI)-i State 16 aser Union Territory (UT) 3 dang Special Intensive Revision (SIR) agitsü tetuyuba agütsüogo aser iba nung Nagaland densema lir.

Tang Census indang house listing maparen inyakba den külemi SIR Phase-III agitsü lemtetogo.

SIR maparen nung vote enoktsürtem, political parties aser election ketdangsurtem ajak adener anungji political party ajaki Polling Booth shia nung Booth Level Agent (BLAs) kaka shimtsü mepishia metetdaksüogo.

qualifying date ji October 1, 2026 asütsü.

1. Preparation, Training & Printing 05.08.2026 to 14.08.2026
2. House-to-House visits by BLOs 16.08.2026 to 14.09.2026
3. Rationalization of Polling Stations By 14.09.2026
4. Publication of Draft Electoral Roll 20.09.2026
5. Period for filing Claims & Objections 20.09.2026 to 20.10.2026
6. Notice Phase/Disposal of Claims & Objections 20.09.2026 to 18.11.2026
7. Publication of Final Electoral Roll 22.11.2026

## Nagaland nung ward 3 nung by-election agitsü

**Dimapur, May 15, 2026 (TYO):** Nagaland State Election Commission (SEC)-i Chümoukedima, Wokha aser Atoizu town councils kübok ward asem nung elections agitsüba osang metetdaksüogo.

Chumoukedima Town Council nung Ward 11 (Chaara), Wokha Town Council nung Ward 8 (Tsumang B) aser Atoizu Town Council nung Ward 9 (Samba Ghoki) nung June 16 nü by-elections agitsü aser June 19 nü votes azüngtsü ta SEC, T John Longkumer-i sangdong ka nung ashi.

Iba indang election programme ya May 15, 2026 nü sayaogo aser May 25 nungi May 29 nikongdang 3:00 ako tashi nominations asütsü. Iba sülen June 1 nü nomination papers reprangtsü ta SEC-isa ashi.

June 2 aser June 3 tsünga candidate temi scrutiny orders meyipa reprangshitsü atema applications agütsütsü akok aser June 4 nü lemtet agütsütsü.

Candidate temi June 5 nikongdang 3:00 ako tashi nung tenüng meyipa agitsü akok aser iba sülen candidates aser polling stations indang final list metetdaksütsü ta SEC John Longkumer-isa metetdaksüogo.

Ward asem nung June 16 anepdang 7.30 ako nungi nikongdang 4:00 ako tashi polling asütsü aser re-poll asütsüsa kümra June 18 nü agitsü aser June 19 anepdang 8:00 ako nungi tenzükba designated counting centres nung votes azüngtsü ta paisa ashi.

Iba osang sangoktsüba ajanga town councils asem telongtet nung Model Code of Conduct (MCC) tenzükogo aser election

maparen metembang tashi iba ozüng alitsü.

MCC kübok candidates, town council telongtet nung inyakba political parties aser state sorkar adener.

Iba election atema returning officers, assistant returning officers aser district-level master trainers nem training agütsüogo ta SEC-isa ashi.

Election tiptema aser timi agitsü atema bangdak town councils-i election observers yoktsü aser election officials o security personnel dang mapa shitak inyaktsü mepishir ta John Longkumer-isa ashi.

Paisa vote enoktsürtem dang election nung shilem agitsü aser political parties, candidates, civil society organizations aser sendaktepa alir ajaki election tiptema agitsüsa yariteptsü mepishia metetdaksüogo.

## Kohima nung NHIDCL maparen meyipa reprangshi

**Dimapur, May 15, 2026 (TYO):** Nagaland nung National Highways and Infrastructure Development Corporation Limited kübok highway mapatong balala inyakba reprangshitsü atema Project Monitoring Group (PMG) senden ka menogo.

Iba senden ya May 14, 2026 nü Kohima Deputy Commissioner office nung Deputy Commissioner Kohima B Henok Buchem menden ser amen.

Iba senden nung Revenue Officer Kohima, district administration ketdangsurtem, NHIDCL teshimtet nübotem, contractors, consultants, aser tanga sendaktepa alirtem aden.

Parnoki four-lane highway maparen inyakba, tunnel yangluba aser Kohima-Dimapur corridor nung traffic management indang asadanga liasü.

Senden nung ketdangsurtemi four-lane highway project shilem lemsar inyakba aser Kohima

bypass yangluba meyipa reprangshi.

NHIDCL-i Package-I nung mapa 26%, Package-II nung 43% aser Package-III nung 90% jungnüa renemogo ta ashi aser July 2026 tashi nungbo traffic movement tenzüktsü imlar ta ashi.

Deputy Commissioner B. Henok Buchem-i department tem aser sendaktepa alir ajak dang amalitepba atema pelaba metetdaksü aser nübotem den tesentaktep tajung lia inyaksangshia aotsü ayongzüik.

## 3 buba Nagaland Potato Festival 2026 mungogo



Jakhama Village Ground nung Women Resource Development and Horticulture Minister Salhoutuonuo Kruse-i 3 buba Nagaland Potato Festival 2026 tenzüktsüdang agiba noksa angur.

**Dimapur, May 15, 2026 (TYO):** May 15, 2026 nü Jakhama Village Ground nung 3 buba Nagaland Potato Festival 2026 ayongzüka mungogo.

Iba benjung ya Women Resource Development and Horticulture Minister Salhoutuonuo Kruse-i lapoktsü aser Nagaland nung alo tsünüba ajanga agri-trade lenmang sadema aliba sayuogo.

Sentong nung Jakhama Baptist Church Sr. Pastor Rev. Zapovil Sophie-i temoatsü meshia sarasadem, Jakhama Village Council Chairman Kehochol Tase-i tesentepertem pelaa agizük aser MLA & Chairman DPDB Kohima Kevipodi Sophie-i salem osang aben.

Deputy Project Director, ATMA Kohima Dr. Keviu Shüya-i okila jembidang alo tsünüba ya

kanga tongtipang aser Nagaland nung shishilembatsü maongka aika lir ta ashi.

Sentong nungsa Department of Tourism Director Veyielo Doulo aser 7th Battalion Madras Regiment, Jakhama Military Station nung Commanding Officer natia o tatsütsü jembi aser Nagaland Potato Festival 2026 Convener Avilie Zhotso-i anküp tepela o jembi.

### Kenten sentong ayongzüka Akashvani Kohima küm 90 ajungbamung amung



**Kohima, Monupii/May 15 (TYO):** Akashvani Kohima-i küm 90 tashi linük tenzüka aruba temaitsü Hokulbar nikongdang Nagaland College of Music and Fine Arts Auditorium, T. Khel, Model Village, Kohima nung musical concert ka ayongzüka liasü.

Iba sentong nung Nagaland College of Music and Fine Arts Choir aser NE Body Can Body Sing 2017 runner-up Manchai Phom nungeri shilem agia liasü. Phom ya Indian Army (Jack in

the Box Band) ajanga ayongzüka Fusion of the Band Hindi 2026 nunga runner-up liasü aser Fusion of the Band Hindi 2026 nung Best Vocalist liasü.

Lai iba sentong nung Phom nunger ken Lungvang Baa ser ano Lakho Hai Yahan aser Yeh Dosti ama Hindi ken aten.

Sempet angua ken atener aser ken zülur aser Seyie\_Intrepid Northeast India tenzüka, Seyievinuo Chuzho-i One Moment in Time ken la kijai

aten aser lar band Seyie\_Intrepid den külemi ano mesayai aliba folk fusion ken Legacy tena liasü. JNV Kohima nungi kaketshir temi National Anthem aten.

Head of Programme (HoP) Ella Kayina ajanga pela agizükba o jembidang Akashvani Kohima nung tribal music broadcast asüba indang jembia aser ibai Hindi film aser Western ken den khenyongi balaka lir ta ashi.

*(Maneni tapak 8 nung...)*

### Minister Kenye-i Oken Jeet Sandham indang kaket trok buba sayatsüogo



**Kohima, Monupii/May 15 (TYO):** Minister, Power and Parliamentary Affairs, K.G. Kenye-i Hokulbarnü osangbener nübu tejen Oken Jeet Sandham indang kaket trok buba "The Naga Talks: Deadlines, Deadlocks and the Search for a Solution" sayatsüogo.

Kenye-i iba sentong nung jembidang, iba kaket ya asen movement indang puti otsü nung alizüng ka amai lir ta ashi aser iba kaket yagi yimten ken o jembishinüba aser Naga nunger yimjung maparen dak sendakba indang tali tejangjaba sayur, ta ashi.

Naga political issue ya putu balala nungi nüburtemi ajangshiba mangatettep tulutiba rongnung ka lir aser aji record tejangja aser kaket tem nung bendena ayutsü tongtipang, ta ashi.

Simon Commission nem 1929 küm memorandum agütsür küm noklang ka tajunger aser tanü tashi iba ken o mebenteti lir, ta Kenye-i ashi.

Naga nunger yimten puti otsü angatetba nung iba ama kaket yagi tarutsü putu anitsü ta pai ashi.

Pai lanur kaket zülur aser

osangbener tem dang yimten indang kisung masü saka tanü Naga nungeri ajangshia aliba tebilemtsü balala indang bendena ayutsü ayongzüka liasü.

Nüburtemi temelenshi jenti ajangshia aruogo aser tanü putu-i mapang talangka melie Naga political journey nung tagrutsü asoshi telemtetba agitsü mapang ajurutsü, ta Minister Kenye-i ashi.

Kaket zülur Sandham-i iba sentong nung jembidang, küm aika Indo-Naga peace process nung temelenshi balala ajangshia aruba sülen aser talisa Government of India aser NSCN (IM) tsüngta August 3, 2015 nung Framework Agreement zülutepba sülen iba kaket ya zülutsü mulungtet, ta ashi.

Ato Kilonser Narendra Modi-i Nagaland Legislators' Forum indang Parliamentary Working Committee züngsemtem dang July 2015 nung "yimjung arura, ibaji rangben arutsü aser solution bener aruba nung Naga nunger ajang tongtipang liasü" ta ashiba sülen pa iba ken o nung temulung tali agütsü, ta pai ashi.

Iba sülen terenlok balala,

taoba interlocutor R.N. Ravi-i inyakba, jembishinü tembangtsü October 31, 2019 tashib züngzüksüba aser Naga nunger nisan aser constitution ama mangatettep aliba ken o tem mechi pai maneni iba yimjung inyakyim indang shisadanga zülutsü ajangmeso, ta Sandham-i ashi.

Iba kaket nungya imlaba, maongka magishiba, yimtenren nung tepenja aliba aser Naga peace talks meketa tia mejangjai aliba indang shia lir aser ajaki agizüktetsüsa aser ajang kongshia tangatettep kati arutsü yimtenren tsütsü tejangraba aser shisatsü tang tashi ali asü mali ta asadanga lir, ta kaket züluri ashi.

Kohima Press Club tir Vishü Rita Krocha-ia iba sentong nung jembia aser lai iba kaket ya tanü tendak yimtenren tsütsü mepetmesü aliba nung shilem tajung agiba amai lir ta ashi.

Sandham-i züluba tem ajang nüburtemi Naga political issue tajungba nung angatetdaksür aser iba kaket ya puti otsü record ka ama aser policy yanglur, tazünger aser lanu putu asoshi lenmang sayur ama lir, ta lai ashi.

### Uniform Model Rules of Procedure indang Committee senden nung NLA Speaker aden

**Dimapur, Monupii/May 15 (TYO):** Mezüngbuba "Committee of the Presiding Officers to frame the uniform Model of Rules of Procedure and Conduct of Business of Legislative Bodies" senden Mysuru, Karnataka nung May 11-13, 2026 anogotem alidang Sharingain Longkumer, Speaker, Nagaland Legislative Assembly den Secretary, Nagaland Legislative Assembly aser ketdangsürtem dena liasü.

Iba senden ya Satish Mahana, Speaker, Uttar Pradesh lenisüba kübok amen aser pai Uniform Model Rules of Procedure and Conduct of Business indang rateta ashi.

Iba sülen linük tesem ajang atema Uniform Model Rules of Procedure and Conduct of Business ka yanglutsü asoshi Committee züngsemtemi jembia liasü.

Lok Sabha Speaker nem iba report agütsütsü asoshi merenemdang State Legislative Assemblies bakaka indang Speakers tem den shisa agiteptsü Committee-i pangjema liasü.

Ano Uttar Pradesh, Maharashtra, Delhi, Himachal Pradesh, Karnataka aser Nagaland indang Secretaries tem senden balaka mena iba Rules asadangtsü telemtetba agi. Taruba Committee senden ya New Delhi nung amentsü.

### Dimapur nung 4 buba EduConnect tenzükogo



**Dimapur, Monupii/May 15 (TYO):** Investment & Development Authority of Nagaland (IDAN) ajanga ayongzüka 4 buba EduConnect: Connecting Education to Opportunities sentong Hokulbarnü Integrated Business Hub & Innovation Centre, Dimapur nung tenzükogo.

Iba sentong nung o jembir, IDAN Chairman, Abu Metha-i, takok education ya takok angutsü atema tetenzükdak aser alima melenshitsu atema tashi lir, ta ashi.

Pai kaketshirtem dang maneni lenla balala nung tetokteper ama alitsü aser digital putu nung tashi angutsü atema maneni shisatsü bushitsü ajangshia liasü.

Alima kanga keraa tejakleni aor aser iba temelenshi den asenok lirumedema aotsü nüngdaker, ta pai ashi.

Paisa kaketshirtem dang pei sempet alima dang sayutsü asoshi social media amshitsü ayongzüka liasü.

Additional Secretary, Finance and IDAN Vineet Kumar-i jembidang, kaketshirtem nem maongka agütsütsü atema widnow lapoktsütsü nükjidong nung iba sentong ya ayongzüka ta ashi.

Pai nisung ajang dang kanga kumdanga agitsü aser osang tejangja meteta alitsü ajangshia liasü.

*(Maneni tapak 8 nung...)*

### Tzudikong town nung welcome gate ka lapok



**Mokokchung, 15th May (TYO):** Tzudikong town kübok Aremsusenba ward nung welcome gate lapokba sentong 15th May, 2026 nü meraketa agiogo.

Iba sentong nung tongti tesemdanger P. Sosang Jamir-i jembidang, ward sangertemi külemi lungjemer teyaritep nung iba ama mapa tajung takok ngua inyakba den pei aliba tesem tobur jungdaksüba asoshi teningsang agütsü.

Iba sentong nung TTBA, Pastor, Moatemsu Longchar-i iba welcome gate meshitetsü. Yanglu Lemtur, (A.Y. Ward Tzudikong), aser W. Yubang Lkr, (Executive Member, Aremsusenba Ward) nadia o tatsütsü jembia tesentepertem ajangshia liasü. Aremsusenba Ward President, I. Meren Lemtur-i iba süngküm maparen takok ngua renemtettsüsa shilem agir kija aser telok ajang dang pelaba lemsatsep.



Petrol aser diesel liter nung sen asem agi timba akümba sülen Jammu, Jammu and Kashmir nung nüburtem petrol pump ka nung totzü enoktsü atema atatepba noksa nung angur. Kümpezü tsüngda tang mezüngbuba totzü nung jenjang ajungketogo.

### CBI-i NEET-UG question paper leak sütsüsang puogo

**New Delhi, Monupii/May 15 (Agencies):** Central Bureau of Investigation-i NEET-UG paper leak sütsüsang bushiteta puogo. Nisungba ya chemistry tesayur PV Kulkarni ta jangjaogo. Pa ya Latur nungi saka Pune nung inyaker.

Agency-i Hokolbarnü nikongtsütsü ashiba agi, Kulkarni ya medical admission tatidang atema inyakyim nung National Testing Agency (NTA) den sendaka liasü, anungji pai question papers nguogo. Pa dak sendakba nung osang tejangja magütsü.

2026 küm April ita tatemlen pai ken o nung aija alisang Manisha Waghmare teyari agia kaketshirtem anidener Pune nung par kidang special

coaching class tem agia liasü, ta CBI ketdangsürtemi ashi.

May 2 nü agiba tatidang paper ya thitsüogo aser June 21 nü agishitsü. Iba tatidang nung kaketshir lakh 22 dak temai shilem agi, anungji iba ya India nung tatidang tulutiba lir.

Special class tem agiba mapang Kulkarni-i tasüngdangbatem den option tem aser answer tem ajak metetdakja liasü. Pai agütsüba tasüngdangbatem ya kaketshirtemi parnok indang notebook tem nung zülüoka ayu, koba NEET-UG 2026 tatidang question paper den kasa liasü, ta ketdangsürtemisa shisem.

May 7 nü Rajasthan nung iba ken o ya temai adokba sülen CBI-i bushisüngdang tenzüik

aser linük kübok tesem balala meita aoba sülen Kulkarni apu aser tashishitsü aketba kuli kaket, electronic gadget aser mobile phone tem pua liasü.

Union ministry of education-i ken o benokba sülen CBI-i May 12 nü ken o benoka liasü. Iba sülen special team tem tentetogo.

May 14 nü tashi nung Jaipur, Gurugram, Nashik, Pune aser Ahliyanagar nungi aibelena alirtem puogo. Parnok rongnungi pongubo okadaki anirogo aser ken o kanga junga asüngdangtsü atema anogo tenet custody nung yua liasü.

Aija alirtem rongnung ana Brehostibarnü apu aser Pune nung okadak kati anir aoba sülen Delhi-i anir aotsü atema yua lir.

### India aser UAE nati LPG supply atema tenangzüktepba yanglu

**New Delhi, Monupii/May 15 (Agencies):** Iran aser Israel-i teyari agüja United States na tsüngda rara ajanga alima ajunga energy dak sendakba nung mepetmesü adoker aliba mapang India-i, Liquefied Petroleum Gas (LPG) supply atema United Arab Emirates den tenangzüktepba ka yangluogo.

India ya alima nung LPG importer tulutiba tem rongnung tanabuba lir, anungji iba tenangzüktepba yangluba ya alima ajunga mepetmesü nung aliba mapang kanga tongtibang lir. Ato Kilonser Narendra Modi-i ghonda ana atema UAE semdangba mapang iba tenangzüktepba yaglua liasü.

LPG atema tenangzüktepba yangluba den linük ana yagi agi strategic petroleum reserves dak sendakba nunga tenangzüktepba ka yangluogo. India nung Hokolbarnü petrol aser diesel jenjang sen asem agi ajungkettsüba sülen ghonda ishika lir iba tenangzüktepba ya yangluogo.

India-Nordic Summit nung adentsü atema aodang Modi mapang tatsüka atema Abu Dhabi nung anenzük aser iba mapang tongtibang tenangzüktepba tem yangluogo. Modi-i UAE tir Sheikh Mohamed bin Zayed Al

Nahyan (MBZ) den ajurutepa liasü.

Kasa mapang nung India aser UAE natisa linük ana tsüngda strategic defence partnership atema framework ka asoshi mulungtepogo, aser Gujarat kübok Vadinar nung rong yanglushiba tesem ka amenoktsü asoshi tenangzüktepba yangluogo.

Anogo ishika tejakdang Mod-i linük ajunga dang totzü kümzüka ayutsü atema kidang nungi dang mapa inyaktsü ayongzüka sülen tang UAE semdangogo. Paisa, office-i aoertem dang public transport amshitsü mesüra nisung shia gari ata-a bener moi külemi senzütsü ayongzüka liasü.

Maneni pai nüburtem dang hon mali-i atatsü aser küm ka shi bendanger linüktem mesemdangtsü ayongzüko, aser iba ajanga alima nung tia tensa ajanga India daka kanga mejungi kongshiba sayur.

Modi-i lisopurtem dang item temepishiba agütsüba sülen India nung Hokolbarnü petrol aser diesel jenjang sen 3 agi timba kümogo.

State meyong totzü company temi petrol jenjang liter nung sen 94.77 aliba 97.77 aser diesel jenjang liter nung sen 87.67 aliba 90.67 kümtsüogo.

### Rathindra Bose West Bengal assembly speaker kümogo

**New Delhi, Monupii/May 15 (Agencies):** Hokolbarnü BJP MLA Rathindra Bose tetokteper melei 18buba West Bengal assembly Speaker mapa abentsü shimogo.

Pa tenüing ya House nung chief minister Suvendu Adhikari-i benok aser iba sülen pro tem Speaker Tapas Roy-i ketdangsüa voice vote agia liasü.

BJP MLA 207-i pa pusema vote agütsüba sülen Roy-i, Bose ya assembly speaker asütsü shimba sangdonga liasü.

Adhikari-i Brehostibarnü

Cooch Behar Dakshin nung MLA Bose ya Speaker mapa asoshi BJP candidate asütsü ta sangdonger liasü. Kasa mapang nung opposition TMC-i iba mapa atema nominee ka danga meyoxtsü telemtetba agi.

Bose-i, Speaker mapa atema Brehostibarnü nomination file süa liasü.

Tawa agiba election nung assembly menden 294 nungi menden 207 akokba sülen iba mapa atema Bose shimtsüba ya formality ka dang liasü.

TMC-i iba tetoktepba nung shilem magütsü telemtetba agiba

ajanga tetoktepba makai takok angutsü atema pa nem lenmang lapoktsü.

Bose ya north Bengal nungi West Bengal assembly Speaker mapa abentsü atema shimba mezüngbuba MLA kümogo.

Bose ya RSS den sendaka lir aser pa chartered accountant ka lir. Pa shimba ajanga taoba mapang Speaker atema party-i obendanger mesüra legal background nungi MLA tem dang shima aliba melenogo.

TMC yisüsüba mapang legislator tejen Biman Banerjee Speaker liasü.

### Rajnath aser Naidu nati AMCA infrastructure project atema nüngshilong azüngtsü

**New Delhi, Monupii/May 15 (Agencies):** Andhra Pradesh chief minister N Chandrababu Naidu, Union defence minister Rajnath Singh, aser minister Nara Lokesh nungeri Puttaparthi nung Hokolbarnü Advanced Medium Combat Aircraft (AMCA) project atema nüngshilong azüngtsüogo.

AP CMO sangdong ka ajanga ashiba agi, AMCA project ya sen crore 15,803 entoka yanglutsü aser iba ajanga nisung 7,500 shi nem mapa inyaktsü asoshi maongka agütsütsü aser India indang indigenous defence aser aerospace manufacturing ecosystem tashi itshidaktsütsü.

AMCA project den bendenloksema Defence Minister aser Chief Minister natisa Drone City inyakyim kübok defence dak sendakba nung tanga project tem atema nüngshilong azüngtsüogo.

Iba tesem semdangba mapang Chandrababu Naidu, Rajnath Singh, Minister Lokesh aser tanga ketdangsürtemi, missiles, hand grenade, modern firearm aser fighter aircraft prototype ka densema military hadir balala sayar aliba asadanga liasü, ta CMO-isa

metetdaktsü.

Kasa mapang nung Flight Testing Centre, Naval Systems Facility, Defence Energetics units, ammunition plants aser Drone City infrastructure project tem atema-a project tem amenoktsüogo.

Defence Ministry sangdong ka ajanga ashiba agi, AMCA Aircraft Integration aser Flight Testing Centre ya Aeronautical Development Agency-i yanglutsü aser iba ajanga India indang Advanced Medium Combat Aircraft programme takaratiba nung tejakdangi bener aotsü atema teyari agütsütsü imlar.

Defence Minister-isa, Anakapalli district kübok T Sirasapalli yimtsüng nung Bharat Dynamics Limited indang Naval Systems Manufacturing Facility tasen ka atema nüngshilong azüngtsütsü.

Maneni Agneyastra Energetics Limited indang Defence Energetics Facility, Sri Sathya Sai district kübok Madakasira nung HFCL Limited indang Ammunition & Electric Fuzes Plant aser Kurnool nung Drone City kübok tanga project tem atema-a nüngshilong azüngtsütsü.



Surat nung Gujarat Metro Rail Corporation (GMRC)-i achaayanga inyakba Surat Metro Rail Project kübok Corridor-2 (East-West Corridor) nung trial run agiogo. Inyakyim shilem 75 bo tembanga inyakogo.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

MONUPII 16, 2026

### NTA-i NEET-UG athitsüsa agitetogo

- P Tiamongba Aier

Kaketshir lakh 22 tema atema National Eligibility-cum-Entrance Test (NEET)-UG 2026 athiba ya India nung tatidang inyakyim nung tetsükdaktsü tulu ka lir aser kaketshirtem tarutsü tia raksatsüba tatalokba ka ama züngshir. Shitakba agibo NEET-UG 2026 ya May 3 nung tembangtsüba liasü saka National Testing Agency (NTA)-i iba tatidang June 21, 2026 nü agishitsü osang metetdaktsüogo. NTA-i May 12, 2026 nü paper jelia temai adoka prokshiba atema NEET-UG 2026 athiba osang metetdakja liasü. Külen, Centre sorkari CBI nem bushisüngdang asütsü mapa lemezüksü. Tatidang jelia paper tema nung adoka prokshi ta ken o adokba sülen bushisüngdanga arudang kaketshirtem yaritsü atema 'guess paper' ka adokba nung chemistry aser biology nung tasüngdangba aika kasa liasü ta bushitetogo. Iba 'guess paper' ya tatidang agitsü ita ka jakdang Rajasthan nungbo coaching hubs atong aser sen aika yong ayok ta media reports ajanga ashir. Iba nung ajemdaker Rajasthan Police Special Operations Group-i bushisüngdang ka tenzüka arur aser nisung 15 puogo. Temulung melemi bilemertemi Question papers tangoktsü atema smartphones masü saka high-definition portable scanners amshi asütsü akok ta bushisüngertemi temulung melemi bilemer. Parnoki scanned copies ji encrypted messaging applications ajanga belenshi aser iba ajanga tasa tajung yanglur inyakba kuli sayur. Iba ashikülak inyakyim liaka, NTA-i kaketshirtem taginüba nung aser national examination system dak temulung alemba nung ajemdaker tatidang athir ta ashir. Ajisüaka, NTA-i temulung alemtsüsa inyaka arur asü marur ta asüba tasüngdangba ang tulu ka adokogo. NEET inyakyim nung tetenzük nungi ashishitepa arur aser state aikati iba format magizüker. NTA-i linük ajungalen NEET agia arudang nübortemi temulung malemetsüsa inyakteta arudar aser ashishitep ken o tem adokpet adoker. 2019 küm Tamil Nadu nung impersonation scam ka adok aser iba mapang kaketshirtemi tatidang zülutsü atema proxies amshi. 2022 nunga Kerala nung tetsür candidate tem mita reprangba atema ashishitep ken o adok aser 2024 paper leak aser grace marks ken o tem adokogo. Tatidang agiba maparen nung temelenshi asütsü atema yaküm Centre sorkari K. Radhakrishnan committee shima mapa nungloktsü aser parnoki NTA yanglushitsü aser tatidang agiba maparen akangshitsü atema State o district ketdangpurtem den tesentaktep tajung ayutsü shiogo. Radhakrishnan committee-isa multi-stage testing, papers aser computers külemi amshitsü aser tim masüba inyakyim noktangtsü atema maparen kar inyaktsü shiogo. Ajisüaka, NTA-i tatidang akangkanga magitetba ajanga kaketshir lakh aika indang tarutsü nung kongshir. NEET ya medical admissions atema ashishitep maliba entrance exam ka asütsü atema tenzüka saka taküm tashi nung ashishitep ken o tem adokba manenba ajanga joko temulung malemetsüsa kümogo, anungji Centre sorkari mongin nisungtem anidena iba khuret ya koktettsü atema asalentong tajung yanglutsü kanga nungdaka kümogo. Yamai dang ora kaketshirtem tia raksatsüba manentsü aser tia makara tapayutsü nisung takümtem lalutsü mapang ajurutsü kecha meteta mali.

## OLEMSABANG

### Shilunoktak - Taochi Aenlenmang

O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Tenaprong Tsüngrem metetba nisung asünung sarasadema mapang tajung ka ata ali. Peipei tsürabur dang asalentong ajak shioktepa sarasadema atatsü mepishi. Talisa Abenla tetsüi iba osang angashia tepela konganga meyui aküm aser Tsüngrem tenüng sanga ashi, "Tsüngremi teraksa po ka tasenkümshitsüogoni..! haleluyah." Asüngdangtepyonga ao nung tena yim balala süaka iba yim anaji lembu kanga tazük ta tsürabur nungi angazük, aser tena kidong balala aser aji shitak taliyim liasü. Tsüngküm mapang ka nung tembartem, shisaluyimertem aser kinungertem jaoktepa arogo nung sati kulizung tajung agi. Tena kibong akümbaji, ya Tsüngrem akhümtsübuba kibong tatishitsü tajung ka ta ajaki kanga nükshi.

Kibong kümer lia aodang ano Dr. Taochibenla Professor angu, aser lar College nungjisa Principal menden tongtet. Külem tenzükertem aser shisaluyimertem ajak asoshi lenisüyim mapaji ochishiba, bendanga agüja inyakba aser temeimji tebang o agi masü saka la mapa agi sayuteta liasü. La lenisüba nung College-ji kanga nungtugu küma shisaliok kija dang mesüi taküm shiaji jenjang aketer kaka lir aser iba alizüngji tongtettsüla ta asüba nung angatetdaktsü.

Lar kaketshir kati künü yamai ashi, "Dr. Abenlai Shipurajem kija dangbo mesayu saka aseni alimaji kudasür ariabilem agi reprangtsü ta asüba sayu."

Shisaliok tsütsü süshia, lokti maparen nung süshia lai inyakba aser sayuba mapa ajakji alima ayimsünga temaba nüsung (authority) amer tashi tua metetjema ao. Ano temaba mapa ka Government of Nagaland kübok Higher and Technical Education Department nung Dr. Taochibenla Director atong. Ammang sangwa metitemi lai kudasür shisaliok yayim tasen nung ajak lirumedema tajungtiba nung aotsü ta shisadanga inyak, lanur lenisüyim nung animeso, aser akok tashi lenimaortem shisaliok tajungba agütsütsü ta shisatet. Ano tesayurtem talila arangshitsü aser puinpitet (technology) hadir amshia lenmang shitak nung sayutetba jenti renlok.

La asalentong tajung aika inyakba rongnung kaji, lenlang nung oa alir tetsürtem kudasür temaba shisaliok ngudaktsütsü ta asübaji liasü. Lai yimtsüng aika semdanga jajaba den, tsüraburtem dang ajungshi aser aiür chanutem dang akhi yimya benshia aruba ajak atendanga oa pei mangdang ayutsü animesoa jaja.

Lokti shisatokden ka nung aiür chanu kati nüktzü aneta noktaker ashi, "Ma'am, nai asalentong tajung tapu balala atongba ajanga ozü yimtsüng nungi tetsür rongnungbo mezüngbuba Ph.D angulaji ni lir." Ano la den külemi inyaka aruba tesayur kati yamai ashi, "Ma'am, nai shisaliok sobaliba nung temelenshi tulu bener arutsüogo. Nai tesayurtemi ochi nung noktaksü tasüitshidaktsüogoni."

La mulung nung teti, Yohan 8:32 "Aser nenoki ochiji metettsü aser ochi jagi nenok nüchi kümdaktsütsü" ta asüba yagi jilanemshidaktsü. Adangji lai mapa agi inyaka sayuba jagi la ajaki akhümtsübu aser la mapa nung ochishibaji ngua la nem Governor Award khonang agütsü. La kinungbu Geology mapa nung mazüangi liaka ano pai teti la mapa tsütsü shia yaritep aser la agi nemadanga bilem.

**Tapu tenet**

**Pa teka nung kolem**

Akümlir wadangji taküm alitsü asoshi jajaba kija dangbo masü saka ibai temelenshi bener arutsür ka liasü. Tanur tilaka shiba mapang kabo jebajeba peisasa amuzüka ao saka tangbo teintet tetsür shibai shisaliok temaba jenjang nung molutetdaktsü, pei mulungjang Tsüngrem nem bendanga agütsüba ajanga iba taochi jagi yangertetba akümlir asoshi tatishitsü tajung aküm.

Lai mapang shia yamai ashi, "Ni ketmungti (masterpiece) masü. Niji kolem (pen) lir. Aser kodang iba kolemji Teyanglur ket nung yutsür, iba kolem tilatiba ka jagia otsü tajungtibaji züluteter."

La otsüji temaba jenjang tongtetba, khonang aser senpet anguba, mesüra mapa tajung ngutetba nungji metembanger, hau lai item ajakji aahzüko. Tangar asoshi taküm bendanga agütsüba, taku tensa ajuruaka item ajak nungji taitoktetba mulungjang shimtetba, aser tarutsü putu asoshi tsüngsü tajung jilubenzüktsü yutsütetba agi tobur junga temtetbaji koda tenükshitsüka.

Lar kaketshirtemi ashi, "Dr. Abenlai meimchir indang kija dangbo mesayu saka lai kudasür meimchir ka kümtettsü ta asüba lentuyu."

Lar tembar kati ashi, "La ochi nung masetshibaji kangasa teindang liasü, anungji iba nung memulungertemia tesüsabo la akhümtsübua atem."

La den külem tenzüker rongnung kati ashi, "Lai mesangoktsüdang mezüngbuba angadang, melenshitsu mashidang lai mezüngbuba anepalu, aser ibaji ajanga ajakji khenyongi balaka kümdaktsü."

Item ola aongmedangtem jagi la koma noktaka lia aru iba noksa sayur. Shilunoktak, ariabilem aser tamang kodanga masetshiba taküm. Tayangba tensa nungi alizüng tongtetba, mit adoka aliba nungi taochi agi sünemtsü shimtet, aser shibai alima tsüngdang chichiba shilunoktakji tereprangtsü koma aji sayutet.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**

## Chhattisgarh nung tamanger ka atema temeden meshir



Progressive Christian Alliance (PCA) lenirtem aser Sharda Baghel nungeri May 11 nü Chhattisgarh state kübok Kanker indang district collector nem tezüluba nung takhangba ka agütsü dang tangokba noksa nung angur.

**Raipur, Monupii/May 15**

**(Agencies):** Chhattisgarh state nung Khristanpur temeden asoshi nokdakba telok kati ketdangsürtem dang rural childcare center ka nung inyaker tamanger ka atema temeden agüjang ta ayongzük, shiba tamangba yimsü melendaktsüba mapa inyaka ta tai tonglokja lir.

Kanker district kübok Sately yimtsü nung Anganwadi ka ketdang asüla Sharda Baghel yagi Khristan yimsü prokshir aser tanurtem dang tekülem kidangi aotsü ajungshir, ta tribal nisung kari tai tonglokja lir.

Iba Anganwadi center nung la den yariteper ana daka tenük yok, kechiaser tena ya Khristan lir.

"Baghel aser ano Khristan staff ana nem April ita nungi itasen magütsür," ta Progressive Christian Alliance (PCA) indang coordinator Pastor simon Digbal Tandi-i UCA News dang May 13 nü ashi.

Baghel-i item taitüsüba magizüker aser Chhattisgarh nung pastor tem, arogo lenir aser social workers temi tentetba PCA teyari nung temeden bushia May 11 nü district collector aser superintendent of police ajurua liasü.

District nung temaba ketdangsür nem tezüluba nung takhangba ka agütsüba nung, Baghel-i la iba Anganwadi center nungya tesüiba küm 34 tashi inyaka arur aser kodanga tamangba yimsü melendaktsüba mapa nung shilem agia mali ta ashi.

Tsürabur shingai taoba mapang la mapa mesüra inyakyim atema ashishia mali, ta lai ashi.

Tai tongloktsüba sülen Anganwadi centre ya shibang aser la nem tesüiba ita ana indang itasen magütsü, ta Baghel-i ketdangsürtem dang ashi.

Baghel aser la den külemi inyaker ya Khristan asüba yong tenük yokba lir, ta Pastor Tandi-i ashi.

Khristanpur masüba tribal yimdaklir temi parnok Hindu yimsü Chhattisgarh nung

agizükdaktsüner ta pai aitsü.

Pastor Tandi-i ano tamanger Lakshmi Devi Bhardwaj ken o athishia liasü, shiba Janjir-Champa district kübok Baloda jila nung tetsürtem indang government primary school ka nung headmistress inyaka aliba anentsü.

May 7 nü distroict education department ajanga suspension order agütsüba nung, Bhardwaj-i kaketshirtem dang Khristan yimsü sayu ta tsürabur kari tai tongloktsü, ta shia liasü.

Iba totuyuba nungya local media reports nung lai tanurtem dang Hindu yimsü aser sünyanglu magizüksü ajungshi ta tai tonglokja aliba athishia liasü.

District education department ajanga internal inquiry ka agiba mapang Bhardwaj anema ken o benokba ya shidak lir ta bushiteta la mapa nungi anentsü.

PCA züngsem Habil Mashi-i ashiba agi, iba amala ken o aika nung nisung kijai pei sasa ozüng amshir aser ketdangsürtem ola madoker.

Taoba ita Chhattisgarh state sorkari anti-conversion law yanglushir agizükba sülen Khristanpur anema inyakba tali kumogo ta pai ashi.

"Tanga yimsü amanger temi onok ya ainer ama repranger aser Khristan yimsü agizükba ajanga mapa tamajung inyaka ama züngshir," ta Mashi-i UCA News dang ashi.

"Tai tongloktsüba samaa aodang, onok dang tai tongloktsür den tangatetep kati arutsü ashir," ta Mashi-i ashi.

PCA-i anti-conversion law yanglushia aliba aitsü aser ibai tamangba yimsü temeden kumzüka ayuba indang masü saka ki tilatem tamangba yimsü nokdangba aser mapa tamajung ama kumdaktsüba indang lir ta ashir.

Chhattisgarh Freedom of Religion Bill yagi küm 58 tejen ozüng ka melenshi aser tashiyim mesüra ashikülak yimya nung tamangba yimsü melendaktsü ta ketdangsür temi angatetba atema temerenshi tesashiba agütsütsü shia lir.

Chhattisgarh nung

Khristanpur anema inyakba tebilemstü tali akumba mapang iba ya ataloker.

2024 küm Chhattisgarh nung Khristanpur dak tenük yoker inyakba 165 liasü, koba linük nung tematiba jenjang tanabuba nung lir, ta New Delhi nung aliba United Christian Forum ajanga ashir.

Chhattisgarh nung nisung million 30 lir aser yangji Khristanpur ya shilem ana majung alir.

## Brazilian nun ka tangar kumzüktsü merangdang tzü nung arakseta asü



Sister Nadir Santos da Silva

**Sicily, Monupii/May 15 (Agencies):** Brazilian nun ka Sicily tzükum nung külemi inyaker sister ka tzüsem tesashi nungi kumzüktsü merangba sülen asü.

Carmelite Sisters Messengers of the Holy Spirit nung züngsem, arishi küm 45 tain Sister Nadir Santos da Silva ya May 11 nü Catania anasa nun ka tzü mawateti aliba kumzüktsü merangdang tzü tarokleni ponger ao.

Kasa arogo nungi züngsem Sister Erica Souza-i ashiba agi, Sister Nadir ya külem züngsem ka ya kumzüktsü merangba mapang tashi atem aser iba sülen tzü nungi süchia orr atsütet.

"Parnoki la shia arudaktsütsü merang saka makok," ta Sister Erica-i sasasetta ashi. Sister ka ya Sicily nung mozü kidang lir, ta laisa ashi.

Italian police reports ajanga ashiba agi, sisters tem ya tzükum nungi talangka mepilai tzü nung ajemshia senzua aliba mapang ajungbena lisem ajemoa ai aser parnok tzü nung alang. Sister Nadir-i parnok yaritsü merang,

## ANO GO ABEN TSÜNGREM DEN

## Mapang tajung shilem

Tanur ka pa aotsü tim lenmang nung sayutetang. A. Shin 22: 6.

Tila tanurtemi tajung , tamajung meteta mali. Pamoki Tsüngremji shiba aser Paji kechi mesük meteter masor. Tila tanurtemi Yisuji temenen purtem asoshi alimai aru ta meteter maso. Kinütemji tebilemtettsü tashi kecha makai dang tenzük. Parnok dang metettsü, angazüktsü, aser bilemtettsü asoshi sayutsüla. Anungji, tanur ka aintsü asoshi tesayubaji tenüngdaktsü. Shidakbaji angazükdaktsünera, shidakbaji sayutsüla.

Shisa taka Solomon, Apijemtsü Shin kaket zülusangi aji angateta liasü. Tanur ka tim lenmangi odaktsütsü asoshi sayutsü tenüngdaktsü ta pai angateta liasü.

Lairen tanurtem dang sayutsübaji majung ama kari angatetera, koda tamashi! Shidakba nung yamaji masü. Tsüraburi tanurtemji anir marura, kari pamok amokbangtsü. Tangar tesayur tenüng zülutsüji tatem maka, medemer, T.V, noksa, saisapong nung nungtugutem kari tanurji sayutsü. Tsüraburi sayutsü mapang tajungji marutsü. Item tesüngmangtsütem asenok tanurtem dang sayutsübakar, Tsüngrem temeim, taitok agütsüba, Khristan taküm. Koda maongka tulu ?

ta Italian Sir news agency ajanga ashi.

Iba osang yagi Sicily nung aliba Catholic nung aoksatsü, kong Sister Nadir ya küm aika inyaka liasü.

"Sister Nadir asüba ajanga onok kanga jashir. Tang tejashi tulu nung alidang, Church of Catania züngsemtemi Carmelite Messengers of the Holy Spirit, lar kinunger aser la meimer ajunga den dena lir," ta Archbishop Luigi Renna of Catania ajanga sangdong ka nung ashi.

Sister Nadir-i timtem nung külen nuns tem kumzüktsü merangba ajanga la takum kuli sayur, ta archbishop-i ashi.

Sister Nadir ya 1980 küm Bahia state kübok Jussiape nung aso. Lar kibong kanga makamait liasü aser arishi küm 5 asü dang la ya Sao Paulo nung la tetsütanutsü aser kinungertem den alitsü yok.

Sister Nadir tanur asü dang pela ali aser lanur asü dang timtem balala ajangshia liasü.

La arishi küm 12 aser 15 tsüngta kanga samaru liasü aser Tsüngrem nungi pila liasü.

Künü la arishi küm 16 ajungtsü lia la sasa la takum tembangtsü bilema alidang ola kati la dang mezüng mera agia tekülem kidangi aitsü ashi. Lai yamaji inyaka aser tanüla nung taneptsü angu.

Küm ana lir 1999 küm Catholic Charismatic Renewal nung la tanüla asendenshiba sülen Carmelite Sisters Messengers of the Holy Spirit nung aden.

Iba arogo Espirito Santo state

kübok Nova Almeida yimti nung 1984 küm tenzuka liasü.

Iba telok yagi Tsüngrem osang prokshitsü atema ken aser media amshir aser yangji tang sisters 181 lir aser Brazil, France, Italy aser Spain nunga kongsang lir.

2004 küm la Italy-i yok, aser yangji Sicily nung küm 15 ali. Yangji la arogo indang mission mapa nung inyaka kibong aika yaria liasü.

2019 küm Sister Nadir ya Brazil-i meyiba ao aser la mapang timba generation balala nungi sisters tem tebila aliba nung apu alaba mapa inyaka liasü.

"La aliba ya tongtipang ta sisters temi jembiba onoki teti angashi. La pela aliba takum ka, jeretperet aser nüburtemi mangatet tashi lai tejangja rasaa ashi," ta Sister Erica-i ashi.

Sister nadir ya ano 2024 küm Brazil yutsü aser arua France nung ali. Iba mapang lai teintet rongtem aser shirangertem semdanga liasü.

2025 küm tatemi la Sicily yimti-i meyipa aru.

"Lai Sicily nung nüburtem meima aser yangji mapa inyaksü jangra liasü. Iba yongji, kinunger dang temelaba asüngdang la yangji arem," ta Sister Erica-i ashi.

La indang asüpila sentong ya May 14 nü Catania metropolitan area kübok San Giovanni la Punta nung Catholic nunger aliba tesem ka nung agi. Brazil nunga la asoshi asüpila sentong ya yimti balala nung agia liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Yashi**

(n) testüba anogo, tanü den atongdakba taoba anogo ( yesterday)  
\* Yashi Monüpii 14 buba anogo liasü.

**Yashi**

(v) tsük amala süsümedema prokshiba ( spread out for leveling like sand and rice)  
\* Anü apudang pakti nung tsük yashia apur.

**OLONG PAITEP # 7505**

1			2							3
4								5		
		6						7		
										8
	9					10				
11										
12						13				
			14							

**TIPLÉN**

- 1. Tajzüktsü / Tan asüba - (8)
- 4. Temenen tanela - (6)
- 5. Senshi - (4)
- 6. Taküm lir - (4)
- 7. Taleptsü yintem - (3)
- 9. Süngdong ka - (3)
- 10. Yimsüsüba kümsük - (4)
- 12. Shiküp-i yangluba tenokdangtsü - (4)
- 13. Jamir tebur dang ajaba - (6)
- 14. Alima yanglusang - (8)

**LANGTSÜNGLEN**

- 1. Temin sülen aliba shilem - (6)
- 2. Asaya - (9)
- 3. D \_ \_ \_ \_ g - (4)
- 5. Ngashi shir ayuba - (9)
- 8. Ninang mojitzü sapuba arem shiruru - (6)
- 11. Ajunga - (4)

**OLONG PAITEP # 7504 TELANGZÜBA**

**TIPLÉN :**

- 1. Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon, 4. Aso, 6. Nile, 9. Alizüng, 10. Omen, 11. Lemta, 13. Ola, 14. Kin.

**NAI-A YA METETTER MA**



Nigeria nung School of Eloquence ajanga "The Longest Speech Marathon by a Team" indang Guinness World Record tasen ka yangluogo.

I ba marathon sentong ya April 1 nungi April 21, 2026 tashi Lagos, Nigeria nung agia liasü aser onükji "20 Days of Eloquence, Nigeria Speaks to the World" liasü. I ba atema May 13, 2026 nü Guinness World Record official adjudicators-i kuli agütsüogo aser o maneni jembibaji ghonda 480 liasü.

**Assam minister punguprong crorepatis lir: ADR**



**Guwahati, May 15, 2026**

**(Agencies):** Assam cabinet nung tezüngzüktep agiba minister punguprong crorepatis lir aser minister ka anema ken o benoka lir ta Association for Democratic Reforms (ADR)-i metetdaksüogo.

Mongulbarnü Chief Minister Himanta Biswa Sarma-i MLA pungu den külemi tezüngzüktep agia liasü. Pa den külemi tezüngzüktep agirtemi

BJP MLA ana- Rameswar Teli aser Ajanta Neog, AGP

MLA Atul Bora, aser BPF MLA Charan Boro nung lir.

Atul Bora-i pa indang election affidavit nung pa anema ken o benoka aliba shia lir. Iba ya Indian Penal Code nung Section 409 dak sendaka lir aser public servant, banker, merchant mesüra agent kati ozüng alema inyakba indang lir ta ADR-i metetdaksü.

Cabinet züngsem punguprong ket nung Rs 1 crore tema rongsen lir. Parnok rongnung Sarma-i Rs 35 crore

tema rongsen aliba shiogo. Paise Rs 16 crore tema sentsüh aliba metetdaksüogo.

Assam nung minister pungu indang average assets ji Rs 10.99 crore lir ta ADR report nungsa shia lir.

Tazünga tsütsü minister pezüi dang graduate level mesüra temaba azünga shia lir aser minister ka Class 10 tashi dang aziung.

Assam cabinet tasen nung tetsür minister ji Ajanta Neog dang lir.

**Assam sorkari küm 15-20 tejen garitem noktangtsü**

**Guwahati, May 15, 2026**

**(Agencies):** Assam sorkari küm 15 aser 20 tsünga tejen petrol aser diesel garitem noktangtsü telemteba agiogo ta Himanta Biswa Sarma-i ashi.

Sorkari environmental aser fuel conservation maparen inyakba nung iba ya shilem ka lir ta CM Sarma-i ashi.

Assam nung BJP-i aniba NDA sorkar kümsük tasembuba nung mezüngbuba state cabinet senden amendang iba lemtet agia liasü.

Iba lemtet ya pollution levels ajemtsü, cleaner transportation ajungmesotsü aser state ajungalen environmental sustainability tajungba akümtsü

atema agiogo ta Sarma-i ashi.

Assam sorkari tesüiba dang nungi petrol aser diesel 20% agi tajemba alizüktsü aser amshitsü ta paisa metetdaksü.

Sorkari transportation amshiba melenshitsü maparen inyaktsü aser conventional fossil fuels ajema amshidaksütsü ta paisa ashi.

**Meghalaya-i NE nung mezüngbuba lanur sabang tenteter**

**Shillong, May 15, 2026**

**(Agencies):** May 12, 2026 nü Shillong nung Young People's Action Group (YPAG) indang mezüngbuba roundtable agiogo.

Iba ya Northeast nung climate aser health policymaking nung lanurtemi shilem agiba mezüngbuba reju asütsü.

Iba sentong ya UNICEF India indang Field Office for Assam and Northeast States-i Centre for Policy den külemi yaritepa ayongzük.

Iba sentong nung lanurtem, researchers, artists, non-profit leaders, practitioners aser sorkar teshimtet nübotem aden aser parnoki climate aser health policy nung lanurtem adentsüba indang jembi.

"Sendaktepa alirtem

olemteptsübaji kanga nüngdaker, kechiyong asenoki sendaktepa alir ajak den jembiba ajanga telatetbatem adoker. Talisa decision-making nung lanurtem dendaksütsübaji kanga tongtipang kechiyong tanü asenoki lemtetbatem jagi parnok tarutsü yangertsü" ta

Meghalaya nung Health and Family Welfare and Sports & Youth Affairs Minister Wailadmiki Shylla-i ashi.

Meghalaya State Commission for Protection of Child Rights nung Chairperson aser YPAG roundtable co-convenor Agatha K Sangma-ia iba mapa ya state sorkari youth policy den puteper ta ashi.

Meghalaya Chief Secretary Shakil P Ahammed-ia policy

yangluba nung lokti taginübatem aser ajangshia arubatem adentsüla ta ashi.

"Iba sabang ajanga lanurtem nem policy merenem dang shilem agitsü maongka agütsür" ta UNICEF India Field Services nung tanishir Ms Soledad Herrero-ia ashi.

Meghalaya sorkari 2025 nun MPOWER project kübok Young People's Action Group pusema nungit aser March 2026 nung Education Minister Lakhmen Rymbui-ia iba ya official süa tenzüktsüogo.

UNICEF India aser Centre for Policy tsünga tesentaktep ajanga tentetba sabang ajanga Meghalaya nung lanurtem nem climate change aser health policy nung shilem agidaksütsü.



Meghalaya Chief Minister Conrad K Sangma-i May 14, 2026 nü Shillong nung Meghalaya Police atema gari tasen 95 sayatsüogo. Iba ya policing, mobility aser emergency response tashi aittsü atema lir aser sorkari Rs 30 crore jungnüa endoka troop carriers, buses, mini trucks, Tata Yodha vehicles aser Maruti Jimnys aliogo. Shillong nung Police Officers' Mess nung sentong agidang Director General of Police I Nongrang-i anir tongti ketdangsurtem aden. Meghalaya state sorkari infrastructure tajungba küma aser mapang talangka mapa tazüng alibatem nung nübo anioka meta talang pilar alidak aser arrtsülen police mapa lemküktsütsü meranga arur. Tawa tu police tasen 3,000 tema aniokogo ta CM Conrad Sangma-i ashi.



Gampaha, Sri Lanka nung tzunglu kanga sashia aruba sülen tzümetsünga aliba noksa ka May 15, 2026 nü tangokba yangi angur. Anüing mepet agi sübanger tesem aisü nung tzunglu aruba ajanga Sri Lanka nung nüburtem timtemtar.

### Ebola tashidak agi DR Congo anüdoklen nisung 65 asü

**Kinshasa, Monupii/May 15 (Agencies):** Democratic Republic of Congo anüdoklen Ituri province nung Ebola pokteta lir ta Africa nung health agency temabai sangdongogo.

Cases 246 aser tasüba 65 shi osang lir aser item ya timba hon atuba Mongwalu aser Rwampara jilatem nung lir, ta Africa Centres for Disease Control and Prevention (CDC Africa) ajanga ashi.

Telangzüba agütsüsü aser cross-border surveillance atema jembishinüsü asoshi DR Congo, Uganda, South Sudan aser tanga international partners senden ya ayonger, ta Hokulbarnü parnoki sangdong nung ashi.

Ebola ya mezüing 1976 küm tang aliba DR Congo nung bushitet aser iba tashidak ya lah nungi prokshia ao südi ta bilemer. Ibai DR Congo nung

iba tetsübotsü tashidak tan agi 17 ben buba pokteter alitsü.

Iba ya temang nung aliba tzü nung kongshiba ajanga prokshir aser azü yima temang shilem mapa meinyaki kumdaktsür.

Iba tashidak menali temang metar, tezü ayanger, mangmanger, tekolak angor aser torok akonger. Ebola tashidak nungi taneptsü angutsü kecha mali.

DR Congo indang Ministry of Health and National Public Institute den shisa agitepba sülen linük yimtiba Kinshasa nung aliba Institut National de Recherche Biomédicale (INRB) nung preliminary tests agidang iba virus ya samples 20 tendangba nungi 13 nung puteta liasü.

Asür 65 rongnung par pezü lab nung jangjar aliba cases tem nungi lir, ta CDC Africa ajanga ashi.

Ituri province yimta Bunia nunga suspected cases lir aser laboratory nung jangjatsü atateper.

DR Congo sorkari yimjak nung iba tashidak ya wara amabo mesangdongi lir.

Ituri ya 2021 nungi mitkar yimsüsüba kübok lir, kong telungpur telok balala aliba samatsüsü mechi civilian ketdangsüba mitkar lenir kati melenzük. Yangji telungpurtem rongnung Allied Democratic Forced (ADF) dena lir, koba Islamic State den sendaktepa lir.

Tesüiba küm 50 tsüingta African linük balala nung iba virus ajanga nisung 50,000 shi süogo.

DR Congo nung iba tashidak ya 2018 aser 2020 tsüingta tesashitiba jateta nisung 2,300 jungnüa asü.

Taoba küm central Kasai province nung iba tashidak jatetba sülen nisung 45 asü.

### Ukraine drone amshia Ryazan amak; nisung asem tepset

**Moscow, Monupii/May 15 (Agencies):** Ukraine-i yokba drone temi central Russia kübok Ryazan yimti nung nisung asem tepset aser aiben atongtepa tua süir aliba kitem raksatsüba den industrial enterprise ka dak kongshio, ta Regional Governor Pavel Malkov-i Hokolbarnü metetdaktsü.

"Tesasatsüka nisung asem tepsetogo aser tanur densema nisung 12 yiruogo," ta Malkov-i Telegram messaging app ajanga metetdaktsü.

Malkov-i ashiba agi, drone temi apartment block ana

raksatsüogo. Paisa, ki teraksa ya ali nung alua industrial site ka dak kongshia liasü ta ashi, ajisiüaka kechi industrial enterprise dak kongshi iba indang osang tejangjabo magütsü.

Unofficial Telegram site Mash-i, aiben atongtepa tua süir aliba ki ka nungi mokozü adokba sayuogo aser ashiba agi kishi ka nokdangogo aser iba ajanga iba kidang alirtem ki toktsür aotsü asoshi tetsükdaktsü adoka liasü.

Tanga unofficial site temia apartment ishika nung mi adokba sayuogo.

Ryazan ya Moscow

southeast len km 200 shi pilar lir, aser iba yimti nung totzü refinery tulu ka amenoka lir.

Kasa mapang nung tepuokertem melentepba nung shilem ka ama Russia-i pur aliba Ukraine nunger sepai 205 kidangi meyipa anir aruogo, ta tir Volodymyr Zelenskiy-i Hokolbarnü metetdaktsü.

Anogo asem atema ceasefire benokba nung shilem ka ama Russia aser Ukraine nati tepuoker meyirejang kaka melenteptsü mulungtepogo. US tir Donald Trump teyongtsüi ia iba ceasefire ya benoka liasü.



Estonia linük nung Narva nung aliba Narva-1 border crossing point ajangtsü atema May 15, 2026 nü nüburtem nokdaktepa aliba noksa nung angur. Brehostibarnü Estonia sorkari linük southeast tsütsü Russia den border crossing points ana ammag nung shibangba ano ita asem atsülangtsü lemtet aser Narva-1 border crossing point lapoka ayuba mapang tatsüba kumsüogo. St. Petersburg anasa tetsüing agi arütsü alema senzüba tongtipang tesemji Narva-1 border crossing point ya kisüing lir. Iba ya timba Europe nung aliba linük tem aser talisa Finland nung alirtemi amshir.

### Telungpurtemi Pakistan sepai ti tepset

**Peshawar, Monupii/May 15 (Agencies):** Telungpurtemi gari nung bomb enoka bener arua Pakistan northwest len security outpost ka amakba sülen telok ana tsüingda khatepba mapang sepai ti tepsetogo aser tanga sepai 35 yiruogo, ta ketdangsürtemi Hokolbarnü metetdaktsü.

Tawa telungpurtemi tesem balala asemen tashi maka nisung 30 shi tepsetba sülen Brehostibar aonung iba outpost ya makogo, aser iba ajanga kidanger Afghanistan den rara tenzükshitsü akok ta tsübua bilemer, kechiyong telungpurtem jenokdaktsüba atema Pak-i parnok aija arudar.

Ajisiüaka Afghanistan nung Taliban-i aniba sorkari iba taitsüba magizüki arudar.

Outpost koba Bajaur district nung Afghanistan den arrtsü nung lir, iba outpost nungi yokba noksa nung kiojentem raksar aliba aser tanungba naknaka ronger aliba nguogo.

"Kiralongrartemi tamasa quadcopter ka agi camp amak aser iba sülen bomb bena aliba gari kati ki dak arua tsüka kanga mejungi pokdaktsü," ta ketdangsür kati ashi.

"Iba sülen prangbong bener arua kiralongrartem security camp telungi ai aser injang khalokja liasü."

Paisa, arrtsü adena linük amakba nokdangtsü atema iba outpost ya kanga tongtibang lir, ta ashi.

Ketdangsür anati ashiba agi, iba tesem nung aliba security force temi kara kara

telangzüba agütsü aser iba tesem amakba kiralongrartem ajak tepsetogo. Ken o dak sendakba nung Pakistan military-i kecha osang magütsü.

Bajaur jila nungi Reuters osangbener kati ashiba agi, bomb kanga sashia apok aser outpost nungi km 20 shi pilar aliba shishilembadak nungia bomb pokdaktsüba tashiji meteta liasü, aser military-i iba tesem temeket nung lenmangtem shibangtsüogo.

Tehreek-e-Taliban Pakistan puri iba tesem amakba nangzükogo.

Honibarnü nü nungi tenzüka Bannu jila anasa tesem ana amakba aser northwest nunga tesem ka amakba sülen nisung 25 tepsetogo aser southwestern Balochistan province nung telungpur telok ka den khatepba mapang sepai pongu tepsetogo, ta military sangdong ka ajanga metetdaktsü.

Islamabad-i ashiba agi, TTP lenirtem aser züingsemtem aika Afghanistan nung amendaker lir, aser parnok dang masü Balochistan atema nüjiso bushirtema Afghanistan nung jenoka lir. Pakistan amaktsü atema telungpurtem nem Afghan litsü amshidaktsür ya ashiba ya kabul-i magizüki arudar.

Islamabad-i February ita anüing ajanga Kabul amak aser ashiba agi, parnoki telungpurtem tamendakdak amaker. Iba ajanga kidanger linük ana tsüingda küm aika tsüingda rara tesashitiba tenzükdaktsü.

### Ali Kimong Ayoker

Four lane anasa Nihoto village nung jenjang tajung aser foot hills road anasa , showuba anasa aser Assam anasa ajak nung mela otetba kimong tajung lir  
Ali bushirtem aruagi reorabgtsu akok  
**Contact no. 89745 02195.**

**File No. Admin-12011(16)/11/2024-eoffice  
Government of India  
Ministry of Health and Family Welfare  
Directorate General of Health Service  
Central Drugs Standard Control Organization  
(Drugs Section)  
\*\*\*\*\***

Ministry of Health and Family Welfare ajanga tsüinglanglen shia aliba ama Central Drugs Testing Laboratory, Hyderabad nung Deputation yimya nung inyaktsü asoshi temsüa aliba candidates nungi application meshir. Employment News nung iba advertisement adoker anogo 60 tsüingta dang applications agizüktsü.  
2. Tali tejangjaba metettsü atema Ministry indang website <https://mohfw.gov.in> mesüra CDSCO website <https://cdsco.gov.in> nung angutsü.

Sl. No.	Name of the Post	Pay as per 7 <sup>th</sup> CPC	No. of Post	Office for which the post is filled up
1.	Junior Scientific Officer	Pay Level 8 of 7 <sup>th</sup> CPC (Rs. 47600 – 151100)	1 (one)	Central Drugs Testing Laboratory, Hyderabad

**(Pawan Kumar)**

**Deputy Director (Admn), CDSCO HQ,  
FDA Bhawan, Kotla Road, New Delhi-110002**  
CBC : 17194/11/0001/2627

### Everton nungi küm 17 asayaba sülen Coleman asaya nungi anentsü



**Monupii/May 15, 2026 (Agencies):**

Seamus Coleman-i, sangdong ka ajanga pa iba season tembangba sülen Everton nung pa indang career tembangtsü ta shiogo. Küm 17 club nungi asayaba sülen pa indang contract season tatem den külemi pa asaya nungi anisingzüktüsü.

Arishi küm 37 tain full-back asayar nem ya Toffees nung coach inyaktüsü atema maongka agütsüogo, saka pai ashiba agi tarutsü atema telemtetba tatsüka lirang agitsü ta shiogo.

Republic of Ireland nunger international asayar ya Everton nung 2009 küm January ita Irish club Sligo Rovers nungi pound million 60,000 agi oa aden aser pa 2019 küm club captain

aküm. 2024 küm Coleman, ya iba club nungi Premier League timtiba asayaba asayar kuma pai taoba mapang goalkeeper Tim Howard-i 354 ben asayar aliba ajateta liasü.

Pai tang tashi nung club nungi 372 ben asayar lir aser iba mapang goal 22 idaktüsü aser assist 24 sütsür lir.

"Iba club nungi küm 17 dak tali asayaba sülen ni iba season ya kü indang career nung tatembangbuba season asütsü ta telemtetba agiogo," ta Coleman-i ashi.

Pa club nungi tatembangbuba asaya ya Deobarnü Sunderland den asayatsü.

Coleman tawa yiruba ajanga

junga masayateti arudar aser pa tang asaya aliba Premier League season nung asemben dang asayar lir.

Pa Black Cats den asayaba asaya nung asayara pa tetoktepba ajak nung Everton nungi timtiba asayar tem ronungi tekububa akümtsü. Pai Dixie Dean aser Leon Osman na ajatetsü, shirnok club tenüing nungi tetoktepba ajanga nung 434 ben asayar lir.

Coleman-i Uefa B License coaching badge agizükogo aser iba ajanga pa arishi küm 16 tashi amateur team aser youth team tem coach asütsü aser assistant coach ama inyaktüsü temsüa kumogo.

2025 küm caoch Sean Dyche mapa nungi anentsüba mapang Coleman-i taoba mapang team-mate Leighton Baines den külemi interim coach mapa inyaka liasü. Pa lenisüba nung Everton pur Peterborough United den FA Cup asaya.

Coleman-i, "fan temi ni kanga nongitba atema kanga pelar. Nenoki kü nem teyari tulu agütsüogo. Ano manager, team-mate aser staff ajak dang kanga pelar," ta ashi.

### Mitoma yiruba ajanga Japan indang World Cup squad nung mezüngok

**Monupii/May 15, 2026 (Agencies):**

Brighton winger Kaoru Mitoma yirur aliba ajanga Japan indang World Cup squad nung mezüngok, aser iba ajanga parnok jenjang mejungi kumogo.

Arisihi küm 28 tain asayar ya taoba hopta Premier League nung Brighton puri goal 3-0 agi Wolves akokba asaya nung hamstring yirua liasü.

"Medical team-i asayamung asayaba mapang tashi nunga pa manepi alitsü ta asatetogo," ta coach Hajime Moriyasu-i Hokolbarnü Tokyo nung squad sangdongba mapang ashi.

Monaco forward Takumi Minamino-a December ita temekok tabelen nung anterior cruciate ligament yiruba sülen masayatetsüsa kumogo.

Taküm World Cup nung Japan team ya Group F nung Netherlands, Sweden aser Tunisia den ata lir, aser parnok mezüngbuba asaya Netherlands den June 14 nü Arlington, Texas nung asayatsü.

Mitoma, shibai goal teku idaktüsür lir pa ya Japan nunger asayatem rongnungi tajungtiba ka lir aser Wembley nung March ita England team goal ka agi akokba asaya nung pai goal ka ya idakja liasü.

Paisa, 2022 World Cup nung Germany aser Spain na akokba asaya nung tongtibang shilem agia liasü. Qatar World Cup nung Japan ya round of 16 nung Croatia-i tsükdaktüsü.

Ajax defender Takehiro Tomiyasu yiruba ajang küm ana tashi Japan team nungi masayai liaka pa squad nung züngoksemogo.

Crystal Palace nungi asayar Daichi Kamada, Liverpool nungi Wataru Endo, Real Sociedad nungi Takefusa Kubo aser arishi küm 39 tain FC Tokyo full-back Yuto Nagatomo nungera team nung züngoksemogo.

Moriyasu lenisüba nung Japan team tanabuba World Cup asayatsü lir.

Kasa mapang nung Japan team Iceland den May 31 nü friendly ka asayatsü. Japan team ya Nashville, Tennessee nung team amendaker asayatsü kong parnok Nashville SC Training Center nung training agitsü.

2026 World Cup atema Japan squad:

Goalkeepers: Zion Suzuki, Keisuke Osako, Tomoki Hayakawa.

Defenders: Yuto Nagatomo, Shogo Taniguchi, Ko Itakura, Tsuyoshi Watanabe, Takehiro Tomiyasu, Hiroki Ito, Ayumu Seko, Yukinari Sugawara, Junnosuke Suzuki.

Midfielders: Wataru Endo, Junya Ito, Daichi Kamada, Ritsu Doan, Ao Tanaka, Kaishu Sano, Takefusa Kubo, Yuito Suzuki.

Forwards: Daizen Maeda, Koki Ogawa, Ayase Ueda, Keito Nakamura, Kento Shiogai, Keisuke Goto.

### STATE OSANG :

Tapak 2 nungi...

### Kenten sentong ayongzüka Akashvani Kohima küm 90...

Hindi ken tem kanga nungtugu aser nüburtem südoksünemdaktüsür, saka tribal ken nungya asen li, asen sobaliba aser asen maitsü indang lir, ta ashi.

Kayina-i tribal music nung tang amshiba yimya tajungba kumdaktsütsü nungdaker aser kentener tem lenmang tajungba nung anitettsüla, ta ashi. Music ka teamwork lir, kong lyricists, ken mejemer aser atener tem kasa tushia amshitsüla, ta ashi.

Tribal music ya aiben nisung kati zülür, mejemer aser atener, aser iba yongji aiben results tajung mangur alitsü akok, ta lai ashi.

A.R. Rahman aser Bhupen Hazarika nunger ama nisung

kar dak alaka kar ken zülutsü, kar ken mejemtsü mesüra atentsü sempet lir, ta ashi.

Kentener tem tajungba kumdaktsüba aser parnok sempet temaba jenjangi ajungketba nung Akashvani Kohima-i tongtipang shilem agia arur, ta Kayina-i ashi.

Akashvani station shia aliba Audition Board ajanga auditions agiba nung modern, devotional aser folk music backgrounds alir kentener temi shilem agitettsü ta ashi.

Lai Akashvani Sangeet Sammelan indang rateta jembidang, iba ya Indian classical aser folk music ajungkettsü atema 1954 küm nungi All India Radio ajanga küm shia ayongzükbba kenten

benjong ka lir ta ashi.

Tang North East nung higher-graded trbal folk artists aliba state ji Meghalaya kisüing lir, anungji iba tesem nung temulung tali agütsütsüla, ta lai ayongzüik. HoP-isa Dialect Assignees dang kententsü sempet alirtem jangjatetsü ayongzüik aser auditions nung shilem agitsü ashi.

Iba sentong nung Padma Shri Neihunuo Sorhie, Press Information Bureau Kohima nungi ketdangsürtem, Nagaland College of Music and Fine Arts indang staff, Akashvani Kohima nung casual assignees tem densema yangji inyakertertem aser temulungertem iba sentong nung dena liasü.

### Dimapur nung 4 buba EduConnect...

Iba sentong nung Atria Institute of Technology aser Investment and Development Authority of Nagaland (IDAN) tsüingta Memorandum of Understanding (MoU) ka zülutep, koba ajanga academic cooperation, skill development initiatives, student engagement programmes aser Nagaland nungi kaketshirtem capacity building aser educational advancement nung yaritsü

nükjidong nung lenmang sayutepba nung lungjemer inyaktüsü. Iba MoU kübok Atria-IT scholarship programme ka IDAN ajanga Future Achievers Scholarship Program nungja nung agütsütsü. Iba scholarships ya kaketshir takok tajung nguteter nem academic tsütsü tematiba jenjang tongtettsü sempet nung ajemdaker agütsütsü. Admission agiba sülen item

kaketshir ya parnok academic performance aser attendance mapang shia reprangtsü.

IDAN aser Nagaland sorkari iba sentong nung yaritepba asoshi Cryptex Solo, Founder, Aakash Baishya ajanga tenüngsang agüja liasü.

Nagaland nung sempet tajung jenti lir, aser maongka shidak aser lenmang shidak sayura, lanurtemi sectors aika nung takok tajung angutsü, ta pai ashi.

### Braintree nungi asayar Smith NZ World Cup squad nung denogo

**Monupii/May 15, 2026 (Agencies):**

Braintree Town defender Tommy Smith aser Nottingham Forest striker Chris Wood na New Zealand indang World Cup squad nung züngoksemogo.

Arishi küm 36 tain Smith ya New Zealand pur tatemsa küm 16 tejakdang World Cup asayaba mapang group stage nung asaya asem nung asayaago, saka pa 2024 küm nungi masayai aruogo.

Braintree pur iba season National League nungi relegate süogo.

Smith den arishi küm 34 tain Premier League forward Wood-a 2010 squad nung densema liasü, aser tena ya New Zealand nunger asayarterm rongnungi tebur World Cups ana nung asayaba

mezüngbuba asayar akümtsü.

2010 küm New Zealand team Italy, Slovakia aser Paraguay den asaya saka knockout stages metongtet. Parnok 1982 aser 2010 küm dang World Cup nung asayar lir.

2026 küm iba asayamung nung parnok group stage nung Belgium, Egypt aser Iran den asayatsü, koba US, Canada aser Mexico nung June 11 nungi July 19 tashi asayatsü lir.

New Zealand team Tampa, Florida nung June 6 nü England den friendly ka asayatsü aser iba masüidang anogo asem jelia parnok Haiti den asayatsü.

Wood shiba temekok yiruba ajanga ita trok masayai lir meyipa aruru asayadar, pa lenisüba nung New Zealand team asayatsü.

### BILEMDANGANG

"Na shitak asütsü atema kardak tai metongloktüsüla."